

## ԱՂՐԲԵՋԱՆԸ ԵՎ ՆԵՈԳԱՂՈՒԹԱՏԻՐՈՒԹՅՈՒՆԸ

**Մարջանյան Ա. Հ.**

*Սեղմագիր*

Գլոբալ «Հարավ» և «Հյուսիս» տարածաշրջանների դիմակայության համալսելու, վերլուծվում է Աղրբեջանի կողմից «նեոգաղութարարության դեմ պայքարի» խոսույթի օգտագործումը «Չմիացած երկրների շարժման» շրջանակներում:

## АЗЕРБАЙДЖАН И НЕОКОЛОНИАЛИЗМ

**Марджанян А. А.**

*Аннотация*

*В контексте противостояния глобальных регионов «Юг» и «Север», анализируется использование Азербайджаном нарратива «борьба с неокOLONИализмом» в рамках «Движения неприсоединения».*

## AZERBAIJAN AND NEOCOLONIALISM

**Marjanyan A. H.**

*Summary*

*In the context of the confrontation between the global «South» and «North», the use of “fight against neo-colonialism” narrative by Azerbaijan within the framework of the Non-Aligned Movement is analyzed.*

## ԱՂԻՐԵՋԱՆԸ ԵՎ ՆԵՈԳԱՂՈՒԹԱՏԻՐՈՒԹՅՈՒՆԸ<sup>2</sup>

### ՆԵՐԱԾՈՒԹՅՈՒՆ

Գլոբալ «Հարավ» և «Հյուսիս» տարածաշրջանների դիմակայության համատեքստում [1] «Արցախյան» հակամարտությանը բնորոշ է անհավասարակշռության իրավիճակ, գոյացած տարբեր ասպարեզներում կողմերի անհավասար կարողությունների և հմտությունների հետևանքով: Անհավասարակշռության այս իրավիճակը շարունակում է գոյություն ունենալ նաև հակամարտության «պատերազմական» փուլի ավարտից հետո՝ մարտահրավերներ նետելով Հայաստանին:

Դրանցից առաջինը առնչվում է ռազմատեխնոլոգիական ոլորտին, մասնավորապես՝ արդյունավետ «կրակային հզորությանը» (*firepower*), իրազեկության (*ISR*)<sup>3</sup> մակարդակին, և արդի C3 համակարգին<sup>4</sup>: Այս հարցին կանդիդատնանք առանձին հոդվածով: Մյուսը առնչվում է հակամարտության «արտաքին չափողականությանը»:

### 1. Խնդիրը

Նկատի ունենք մի կողմից՝ Ադրբեջանի և յուր անվտանգային ու ռազմական դաշնակիցների (Իսրայել, Թուրքիա, Պակիստան, Բելառուս, ՌԴ, Ուկրաինա և այլն), մյուս կողմից՝ Հայաստանի և իր սակավաթիվ ու ոչ այնքան արդյունավետ դաշնակիցների ցավագին իրադրությունը: Դրա գոյացման պատճառները մի քանիսն են [2], բայց այստեղ մեզ հետաքրքրում են նրանք, որոնք անմիջականորեն կապված են «Հարավ/Հյուսիս» գլոբալ դիմակայության հետ [1]:

Խոսքը մի կողմից՝ «Չմիացած երկրների շարժման» (ՉԵՇ)<sup>5</sup> հետ Ադրբեջանի համագործակցության բնույթի և խորության մասին է, մյուս կողմից՝ Ֆրանկոֆոնիայի միջազգային կազմակերպության (ՖՄԿ)<sup>6</sup> հետ Հայաստանի համագործակցությանը: Արդյո՞ք այն հավասարակշռում է Ադրբեջան–ՉԵՇ համագործակցությանը:

<sup>1</sup> ՄԱԿ 28 ազգային փորձագետ (էներգետիկա), ԵՄ ազգային փորձագետ (տրանսպորտ), ԵԱՏՄ Փորձագիտական ակումբի անդամ, առաջատար վերլուծաբան, տեխ.գ.դ., ա.գ.ա.:

<sup>2</sup> Հոդվածը խմբագրություն է հանձնվել 10.07.2024 թ.:

<sup>3</sup> Հետախուզություն, դիտարկում, տեղազննում (*intelligence, surveillance, and reconnaissance, ISR*).

<sup>4</sup> Հրամանատարություն, ղեկավարում, կապ (*command, control, and communication, C3*).

<sup>5</sup> [Non-Aligned Movement](#). Ունի 120 անդամ-պետություն, այդ թվում՝ 1 եվրոպական (Բելառուս, այն միաժամանակ նաև ՀԱՊԿ անդամ է), 37՝ ասիական, 53՝ աֆրիկյան, 26՝ ամերիկյան և 3՝ օվկիանիայի երկիր:

<sup>6</sup> L'Organisation internationale de la Francophonie ([OIF](#)). 2020 թ. դրությամբ միավորում է 54 լիիրավ, 7 ասոցիացված անդամ-պետություններ, ինչպես նաև 27 դիտորդ անդամներ: 2003-ից՝ Հայաստանը OIF-ի դիտորդ է, 2008-ից՝ ասոցիացված անդամ: 2012 թ. հոկտեմբերին Հայաստանը դարձավ OIF 54-րդ լիիրավ անդամ պետություն:

## 2. «Ֆրանկոֆոն երկրների կազմակերպությունը»՝ ընդդեմ «Զմիացած երկրների շարժման»

Զխորանալով խնդրի մանրամասների մեջ նշենք, որ մինչ 2012 թ. թե՛ Հայաստանը, թե՛ Ադրբեջանը ՉԵՇ դիտորդ անդամ երկրներ էին: Սկսած 2012 թ. հոկտեմբերից Հայաստանի ՖՄԿ հետ համագործակցությունը այն ժամանակվա իշխանությունները սկսեցին դիտարկել որպես Ադրբեջան–ՉԵՇ համագործակցության յուրօրինակ հակակշիռ, մասնավորապես 2015-ին՝ Հայոց ցեղասպանության 100-ամյակին սպասվող «ցունամիի» ենթադրյալ «ալիքին» ընդառաջ:

Մինչդեռ, Ադրբեջանի համագործակցությունը ՉԵՇ հետ աճում էր, առանձնանալով հիմնական նպատակին (հաղթանակ ԼՂԻՄ/ԼՂՀ-ում, դրա հայաթափում) հասնելու գործում հետևողականությամբ, և ՉԵՇ իսլամական երկրների ու Իսրայելի միջև ճկուն հավասարակշռության պահպանմամբ: Այս ամենն *ընթանում էր ՉԵՇ անդամ երկրների հետ Կոնստանդնուպոլիսի և քաղաքական հարաբերությունների խորացմամբ, հիմնված թափ հավաքող նեոգաղութատիրության խոսույթի օգտագործման վրա, և զուգորդված «նավթային բիզնեսի» փարրերով:*

Իսկ Հայաստան–ՖՄԿ համագործակցության արդյունավետությունը իր գործնական, առաջին հերթին՝ ենթակառուցվածքային ու աշխարհաքաղաքական առումներով սկսեց հիշեցնել Հայաստան–ՄՕՏՀ<sup>7</sup> և Հայաստան–TRACECA<sup>8</sup> «համագործակցությունը», որոնց անարդյունավետության ու անպտղության պատճառով «համագործակցություն» բառը ստիպված ենք վերցնել չակերտների մեջ: Արդյունքում, 2015 թ. վերջից սկսեց աճել «Ադրբեջան–ՉԵՇ» և «Հայաստան–ՖՄԿ» միջև անհավասարակշռությունը: Իրադրությունն այստեղ սկսվեց փոխվել միայն վերջերս, Արցախի «լուծարումից» և լիակատար հայաթափումից հետո միայն, Հայաստան–Ֆրանսիա ռազմատեխնիկական որոշակի համագործակցության մեկնարկով:

Իրադրությունը դարձավ հատկապես ընդգծված սկսած 2019-ից, երբ ԱդրՀ-ն միաձայն ընտրվեց ՉԵՇ նախագահող երկիր՝ 2019–2024 թթ. համար: Ընդգծենք, որ *ադրբեջանական վարչակազմի համար այս հանգամանքը դարձավ վճռական գործոն և ուրվագծեց 2019–2024 թթ. որպես «Արցախյան հարցի վերջնական լուծման» ամենանպաստավոր ժամանակահատված:*

2019 թ. հոկտեմբերի 25-26-ին Բաքվում կայացավ ՉԵՇ անդամ երկրների ղեկավարների 18-րդ Կոնֆերանսը՝ «[Բանդունգյան սկզբունքների](#)» պահպանմանը, արդի աշխարհի մարտահրավերներին (ի՛նչ «նեոգաղութատիրությանը» – Ա.Մ.) համաձայնեցված և համակարգված պատասխան տալու նպատակով» խորագրով: Ավելին, 2023 թ. հուլիսին Բաքվում հիմնվեց «Գաղութատիրության և նեոգաղութատիրության դեմ պայքարի


<sup>7</sup> Սևծովյան տնտեսական համագործակցության կազմակերպություն ([BSEC](#)): Զնայած նրան, որ Հայաստանը ՄՕՏՀ անդամ էր դեռ 1999-ից, համագործակցությունը այստեղ կարելի է համարել ամբողջովին ձախողված [3]:

<sup>8</sup> «[Transport Corridor Europe Caucasus Asia](#)». Հայաստանը դրան անդամակցում է 1993-ից, սակայն կիրառական նշանակության արդյունքները կարելի է, և պետք է, համարել զրոյական:

օժանդակման նախաձեռնող խումբը»<sup>9</sup>, որն առավել հայտնի է իր ռուսերեն հապավմամբ՝ БИГ (Бакинская инициативная группа) [4].

БИГ նպատակը հստակորեն նշել էր հենց նախագահ Ի. Ալիևը՝ 2023 թ. հոկտեմբերի 20-ին Բարձրում մեկնարկած «Նեոգաղութատիրություն. Մարդու իրավունքների խախտում և անարդարություն» խոսույն խորագրով միջազգային համաժողովի մասնակիցներին ուղղված իր ողջույնի խոսքում. «Աղբրեջանը չափազանց մրտահոգված է 21-րդ դարում գաղութատիրության շարունակմամբ և դրա նոր դրսևորումների աճող միտումներով: Թեև Բանդունգի կոնֆերանսից անցել է մոտ 70 տարի, կան երկրներ, որոնք դեռ շարունակում են գաղութատիրությունը: Այդ երկրներից մեկը Ֆրանսիան է: Ընդհանրապես մարդկության գաղութատիրական պատմության արյունալի հանցագործությունների մեծ մասը կատարել է Ֆրանսիան»:

Կոնֆերանսին մասնակցում էին ներկայացուցիչներ Ալժիրից, Քենիայից, Մալիից, Մարոկկոյից, Եթովպիայից, ինչպես նաև Գվադելուպայից, Մարտինիկայից, Նոր Կալեդոնիայից, Ֆրանսիական Գվիանայից և Պոլինեզիայից: «Այսինքն այն երկրներից, որոնք ժամանակին առավելագույնս տուժել են ֆրանսիական գաղութատիրությունից, իսկ այսօր տառապում են ֆրանսիական նեոգաղութատիրությունից: Ըստ էության, դրանք բոլորն էլ Ֆրանսիայի գաղութներ են, ֆորմալ առումով՝ ֆրանսիական անդրծովյան տարածքներ» պարզաբանվում է [4]-ում: Կոնֆերանսի նյութերին կցված էր «Ֆրանսիական գաղութային կայսրության փլուզումը» վերնագրով քարտեզը, որը և վերարտադրում ենք այստեղ (Քարտեզ 1):



Քարտեզ 1. «Ֆրանսիայի գաղութային կայսրության քայքայումը». Աղբյուր՝ [4]:

<sup>9</sup> «Инициативная группа для поддержки борьбы с колониализмом и неоколониализмом».

2024 թ. ապրիլի 17-ին Ֆրանսիան ետ կանչեց իր դեսպանին Բաքվից, իսկ հաջորդ օրը՝ 2024 թ. ապրիլի 18-ին, Ադրբեջանի Միլի Մեջլիսում տեղի ունեցավ «Նոր Կալեդոնիա. Պատմություն, արդի մարտահրավերներ և սպասվող ապագա» խորագրով գիտաժողովը [5]: Դրա ընթացքում Նոր Կալեդոնիայի Կոնգրեսի ենթակառուցվածքների հանձնաժողովի նախագահ Ն. Օմայրան համագործակցության մասին հուշագիր ստորագրեց Ադրբեջանի հետ: Նրա խոսքերով «հուշագիրը ներառում է քաղաքական աջակցություն: Միևնույն ժամանակ, մենք կկարողանանք զարգացնել մեր համագործակցությունը այնպիսի ոլորտներում, ինչպիսիք են՝ տնտեսությունը, մշակույթը և բնապահպանությունը: Մեզ համար նոր էջ է բացվում, այսօր մենք երկու ժողովուրդների միջև նոր պատմության հիմքն ենք դնում» [5]:

2024 թ. մայիսի 16-ին, Նոր Կալեդոնիայում սկսվեցին անկարգություններ, որոնք հանգեցրին բախումների և զոհերի: Ֆրանսիան ստիպված եղավ 600 ժանդարմ ուղարկել Նոր Կալեդոնիա՝ տրանսպորտային ենթակառուցվածքները վերահսկելու և արտակարգ դրության պայմաններում կարգուկանոն պահպանելու համար: Մայիսի 23-ին Ֆրանսիայի նախագահ Է. Մակրոնը ստիպված էր ժամանել Նոր Կալեդոնիա, իրադրությունը կարգավորելու նպատակով<sup>10</sup>:

Անկարգությունների ընթացքում սադրիչների ձեռքում նկատվեցին ադրբեջանական դրոշմեր: Ըստ Ֆրանսիայի ՆԳՆ ղեկավար Ժ. Դարմանինի *Politico* ամսագրին տրված հարցազրույցի՝ «Ադրբեջանական հետքը այս անկարգությունների կազմակերպման մեջ հորինվածք չէ ամենևին: Ես ասիտում եմ, որ որոշ անջատողականներ գործարքի են գնացել Ադրբեջանի հետ»<sup>11</sup>:

Ըստ նույն աղբյուրի, «Ֆրանսիայի հետախուզության ներկայացուցչի խոսքով՝ Մոսկվան և Բաքուն խաղաղօվկիանոսյան արշիպելագի բնակիչների շրջանում հետևողականորեն առաջ են քաշում՝ «Ֆրանսիան գաղութատիրական պետություն է» խոսույթը»:

Իր հերթին, Ադրբեջանի ԱԳՆ պաշտոնական ներկայացուցիչ Ա. Հաջիզադեն հակադարձել էր, որ «Ֆրանսիայի ՆԳ նախարարը պետք է կենտրոնանա անդրծովյան տարածքների նկատմամբ իր երկրի ծախողված քաղաքականության վրա, ինչը հանգեցրեց նման բողոքի»: Իսկ Ադրբեջանի ԱԳՆ պաշտոնական բողոքի նոտայի մեջ նշվում էր, որ. «Ի տարբերություն Ֆրանսիայի, որտեղ համարարած արձանագրված են մարդու իրավունքների կոպիտ խախտումների փաստեր, անկարգությունների ժամանակ ցուցարարների սպանություններ, իսլամաֆոբիայի դրսևորումներ և մահմեդականների վրա հարձակումներ, ինչպես նաև հակասեմիտիզմ, Ադրբեջանում լիովին ապահովված են [մարդու] հիմնարար իրավունքներն ու

<sup>10</sup> Макрон прибыл в Новую Каледонию на фоне беспорядков. РБК, (23.05.2024), <https://www.rbc.ru/rbcfreenews/664e8ec19a7947c1062041d7> (բեռնման օրը՝ 16.06.2024).

<sup>11</sup> <https://www.politico.eu/article/france-accuse-azerbaijan-fomenting-deadly-riot-overseas-territory-new-caledonia/> (բեռնման օրը՝ 16.06.2024).





Ուկրաինայում ՌԴ կողմից վարվող Հատուկ ռազմական գործողությամբ (ՀՌԳ), կամ բացատրել «ՀՀ-Ֆրանսիա» ռազմատեխնիկական որոշակի համագործակցությամբ:

Մեր կարծիքով Ֆրանսիայի (և Չինաստանի) ներկայիս հատուկ վերաբերմունքն ու դիրքորոշումը թե՛ ՀՌԳ, թե՛ ԼՂՀ, և թե՛ ՄԱ կոնֆլիկտների նկատմամբ, հատկապես՝ ԱՄՆ-ի «ռազմավարական ուշաթափության» ներկայիս պայմաններում, կապված 2024 թ. նոյեմբերյան նախագահական ընտրությունների (ներքին կայունության կորստի վտանգ) և Մերձավոր Արևելքում շիկացող իրավիճակի («Իսրայել-Լիբանան-Հեզբոլլահ» նոր հակամարտության հնարավորություն)<sup>14</sup> հետ, գնում են մինչև անցած դարի վաղ 90-ականներ: Երբ ակտուալ էին փլուզվող ԽՍՀՄ նախկին հանրապետություններում խորհրդային ատոմային զենքի «ժառանգության» հարցերը, ձևավորվում էր Բուդապեշտյան հուշագրերի մեխանիզմը, և նախկին խորհրդային հանրապետությունների ինքնիշխանության ու սահմանների ճանաչման հարցերը: Դրանց բոլորում Ֆրանսիան ուներ իր հատուկ դիրքորոշումները և իրացրեց դրանք տարբեր փաստաթղթերի և պայմանավորվածությունների միջոցով<sup>15</sup>: Ֆրանսիայի հատուկ կեցվածքը գնում է նույնիսկ էլ ավելի հեռուն՝ ընդհուպ մինչև 1966-ին ՆԱՏՕ-ի «Միջուկային պլանավորման» համակարգից Ֆրանսիայի դուրս գալուն, ու դրան ետ վերադարձը՝ արդեն 2009-ին, 2008-ի վրաց-օսական «քառօրյա» պատերազմից և դրանում ՌԴ դերակատարումից հետո:

Չտեսնել, կամ դիտարկումներից դուրս թողնել այս ամենը, ոչ միայն անթույլատրելի պարզեցում է, այլև սխալ հաշվարկների ու վճիռների կայացման գրավական:

#### **4. Աֆրիկյան Սահելի 2019–2023 թթ. «հեղաշրջումների գոտին»**

Կիրառական տեսանկյունից մեզ համար առավել նշանակություն ունի Ադրբեջանի արտաքին քաղաքականության համաժամանակեցումը ՌԴ այն գործողությունների հետ, որոնք առնչվում են [Սահելի](#) երկրներում<sup>16</sup> վերջին տարիներին արձանագրված հեղաշրջումների շարքին, ու դրանցում ռուսական «Վազներ»<sup>17</sup> մասնավոր ռազմական ընկերության (ՄՌԸ) ներգրավվածությանը: Խոսքը անցած 5 տարիների ընթացքում աֆրիկյան 7 երկրներում (որոնցից 6-ը՝ Սահելում) 10 հեղաշրջումների շարքի մասին է (տե՛ս **Քարտեզ 2**):

Պատմականորեն բոլոր այդ երկրները Ֆրանսիայի գաղութային համակարգի մաս էին կազմում, և, գտնվելով ֆրանսիական քաղաքական, տնտեսական, քաղաքակրթական ու լեզվական երկարատև ազդեցության տակ, հանդիսանում էին «ֆրանկոսֆերայի» էական

<sup>14</sup> Միանգամայն համահունչ «Ֆարլեյի օրենքի» աշխարհաքաղաքական ասպեկտի մեր ձևակերպմանը, [2]:


<sup>15</sup> Տես տակտիկական միջուկային զենքին և մեր տարածաշրջանին նվիրված մեր հոդվածաշարը ԱՌՎԱԿ կայքէջում:

<sup>16</sup> Արաբերեն՝ «սահել» բառից՝ «ափ», «սահման»: Սահարայի անապատից հյուսիս ընկած Աֆրիկյան երկրների գոտի:

<sup>17</sup> Ստեղծվել է հավանաբար 2013-ին (*Moran Security Group*), ակտիվ մասնակցություն է ունեցել Սիրիայում, Ուկրաինայում և Ղրիմում 2014-ից ծավալվող ռազմական ու քաղաքական գործընթացներում:

բաղադրիչ: Մեր վերլուծության համար կարևոր է հասկանալ «Սահելյան» հեղաշրջումների այս շղթայի ժամանակագրությունը:

Այն սկսվում է 2019-ի ապրիլի 11-ով, երբ Սուդանում բանակի կողմից իշխանությունից հեռացվեց նախագահ Օ. Ալ-Բաշիրը, իսկ օգոստոսին անցումային կառավարության ղեկավար կարգվեց Ա. Համդուկը: Սուդանում երկրորդ հեղաշրջումը տեղի ունեցավ 2021 թ. հոկտեմբերին, երբ ձերբակալվեց արդեն Ա. Համդուկը ու լուծարվեց անցումային վարչակազմը: 2023 թ. ապրիլից Սուդանում սկսվեց նախկին խռովարարների միջև պատերազմը (արդյունքը՝ հազարավոր զոհեր, 3.6 մլն տեղահանվածներ): Հաջորդ հեղաշրջումը տեղի ունեցավ 2020 թ. օգոստոսի 18-ին՝ Մալիում, և կրկին անգամ այդտեղ՝ 2021 թ. մայիսի 24-ին: Հաջորդը՝ 2021 թ. ապրիլի 20-ին՝ Չադում, հաջորդը՝ 2021 թ. սեպտեմբերի 5-ին՝ Գվինեայում: Հաջորդ երկուսը՝ Բուրկինա Ֆասոյում, 2022 թ. հունվարի 24-ին և սեպտեմբերի 30-ին: Վերջապես, 2023 թ. հուլիսի 26-27-ին՝ Նիգերում և օգոստոսի 30-ին՝ Գաբոնում, (տե՛ս **Քարտեզ 2**):



**Քարտեզ 2.** 2019–2023 թթ. Աֆրիկյան Սահելի «հեղաշրջումների գոտին»:  
 Աղբյուրը՝ [Le Monde](#), 09.09.2023.

Այս 10 հեղաշրջումներից գրեթե բոլորում հստակ նշմարելի է ՌԴ, մասնավորապես՝ «Վազներ» ՄՌԸ անմիջական կամ անուղղակի դերակատարումը, իսկ որոշներում՝ նաև Ադրբեջանի ներկայությունը: Սա կարևոր հանգամանք է, ու դրան դեռ կանդիդատանք ստորև: Բայց մինչ այդ շեշտենք երկու փաստ:



Նախ, ֆրանսիական «Լե Մոնդ» ամսագրի այս ինֆորմատիվ ու շատ օգտակար գրաֆիկայում նշված է Գաբոնը<sup>18</sup>, որը երկրների այս շարքում միակ ոչ-Սահելյան երկիրն է (**Քարտեզ 2**): Սակայն, չգիտես ինչու, այստեղ հիշատակված չէ Կենտրոնական Աֆրիկյան Հանրապետությունը (ԿԱՀ, ԱԲ, քարտեզում՝ REP. CENTRAFRICAINE), մինչդեռ այստեղ 2018-ին ծավալված դեպքերը, կարծում ենք, անմիջական կապ ունեն թե՛ 2019–2023 թթ. Սահելյան հեղաշրջումների հիշյալ շրջանի, թե՛ դրանցում «Վազներ» ՄՌԸ դերակատարման հետ:

Հիշեցնենք, որ 2018 թ. հուլիսի 30-ին ԿԱՀ-ում սպանվեց ռուսաստանցի Օ. Զամալը ու երկու այլ լրագրողներ, որոնք ԿԱՀ էին ժամանել այս երկրում «Վազների» գործունեության, մասնավորապես Ե. Պրիգոժինի կողմից ոսկու հանքերի շահագործման մասին ֆիլմ նկարելու նպատակով: Մամուլում նշվում էր, որ այս ֆիլմի ֆինանսավորումը ապահովում էր ռուսաստանյան նախկին օլիգարխ, «Юкос» նավթային ընկերության սեփականատեր, իսկ այսօր՝ վտարանդի Մ. Խոդորկովսկին:

Հիշեցնենք նաև, որ Օ. Զամալը՝ Հայդար Զամալի որդին է: Իսկ այն հարցերը, թե ինչ շոշափելի ազդեցություն են ունեցել հայր և որդի Զամալները Մոսկվայում և ՌԴ-ում հակահայկական և հակահայաստանյան տրամադրությունների տարածման ու արմատավորման գործում, ի՞նչ կապ են ունեցել ադրբեջանական «հակաիմպերիալիստական և հակա-գաղութարարական» շրջանակների, ու, առհասարակ՝ ռուսաստանյան «ծախական» շարժումների հետ, դեռ կարոտ են համակողմանի ուսումնասիրության:

Երկրորդը. կարծում ենք, որ Սահելյան հեղաշրջումների շրջան անհրաժեշտ է դիտարկել հարցին առնչվող ավելի լայն երևույթների համատեքստում: Այս առումով չափազանց կարևոր է շեշտել հետևյալը. 2023 թ. հուլիսի 27-28-ին Ս. Պեպերբուրգում «ՌԴ-Աֆրիկա» գագաթնաժողովի<sup>19</sup> անցկացումը, 2023 թ. հուլիսի 27-ին Նիգերի հեղաշրջումը, 2023 թ. հուլիսին Բաքվում ԵՄԳ սպեղծումը (տես վերը) անհրաժեշտ է դիտարկել ոչ թե որպես ժամանակային պարզ զուգահեռություն, այլ որպես մտադրությունների և գործողությունների համաժամանակեցում (սինխրոնացում): Այս տեսանկյունից հատկապես ուշագրավ է, որ «Սահելյան հեղաշրջումների շրջան» սկսվում է հենց 2019-ից, երբ Ադրբեջանը դարձավ ՉԵՇ-ը նախագահող երկիր:

Այս հանգամանքն ընդգծելու համար հավելենք հետևյալը:

<sup>18</sup> Այսօր ուսանելի է վերադառնալ Գաբոնի (և Մոզամբիկի՝ «ֆրանկոսֆերայի» ևս մեկ երկրի) ներկայացուցիչների ընդհանուր առմամբ՝ պրոհայկական ելույթները ՄԱԿ-ի ԱԽ 2023 թ. նիստին, տես՝ <https://hy.armradio.am/archives/353988> (բեռնման օրը՝ 06.06.2024):

<sup>19</sup> Второй Саммит «Экономический и Гуманитарный Форум Россия – Африка». Ըստ որոշ հրապարակումների, գագաթնաժողովի կուլուարներում նկատվել էր «Վազների» դեկավար Ե. Պրիգոժինը: Հիշեցնենք, որ 2023 թ. հունիսի 23-24-ին Ե. Պրիգոժինի գլխավորությամբ ՌԴ-ում տեղի ունեցավ զինված ապստամբության փորձ (արշավ՝ Ռոստովից դեպի Մոսկվա): Երկու ամիս անց, 2023 թ. օգոստոսի 23-ին, դեպի Վալդայ (ՌԴ) թռիչքի ժամանակ առեղծվածային «ավիավթարում» զոհվեցին Ե. Պրիգոժինը, Դ. Ուսկինը («Վազներ»), Ե. Մակարյանը («Մակար») և այլք: Պրիգոժինի մահից հետո «Վազները» լուծարվել է, անձնակազմը՝ մասամբ անցել ՌԴ ՊՆ ենթակայության ներքո:

2024 թ. ապրիլի 4-ին Կոնգոյի Հանրապետության (Բրազավիլ, ԿՀ) նախագահ Սասու-Նգեսսոի հետ հանդիպմանը Ադրբեջանի նախագահ Ի. Ալիևը ընդգծել էր<sup>20</sup>, որ «որոշ ժամանակ առաջ Ադրբեջանում ստեղծվել է ԵՄԴ նախաձեռնությունը, որի հիմնական նպատակն է պայքարել գաղութատիրության նոր դրսևորումների դեմ և աջակցություն ցուցաբերել գաղութատիրությունից տառապող ժողովուրդներին՝ օրինական հիմունքներով ապահովելով նրանց ազատությունը»:

Այս հանդիպումից մի քանի շաբաթ անց, 2024 թ. մայիսի 19-ին, կիրակի առավոտյան, Կոնգոյի Դեմոկրատական Հանրապետությունում (Կինշասա, ԿԴՀ, Քարտեզ 2-ում՝ *République démocratique du Congo*)<sup>21</sup> տեղի ունեցավ հեղաշրջման փորձ, որն արագորեն ճնշվեց զինվորականների կողմից<sup>22</sup>: Իրադարձությունները տեղի էին ունեցել Կոնգո գետի աջ ափին, ԿԴՀ մայրաքաղաք Կինշասայում<sup>23</sup>, նախագահ Ֆ. Տշիսեկեդիի նստավայրի մոտ: Պաշտոնական հաղորդագրությունների համաձայն՝ «հեղաշրջման փորձին մասնակցել են մի շարք օտարերկրացիներ և կոնգոլեզցիներ»: Ավելի ուշ ԿԴՀ-ում ԱՄՆ-ի դեսպան Լ. Թեմլինը իր բլոգում գրել էր, որ «մտահոգված է հեղաշրջման փորձում ԱՄՆ-ի քաղաքացիների մասնակցության լուրերով», իսկ սոցցանցերում տարածված հոլովակներում նկատելի էր, թե ինչպես են ռազմական հագուստով մարդիկ Կինշասայի Նախագահական պալատի մոտ ծածանում նախկին Զաիրի դրոշմ<sup>24</sup>:

Կիրակի երեկոյան ու հաջորդ օրերին հրապարակումներ հայտնվեցին այն մասին, որ Կինշասայում հեղաշրջման փորձը կազմակերպվել է Կոնգոյի (Բրազավիլի) կողմից: Ինչն, իհարկե, հերքվեց պաշտոնական ԿՀ կողմից, նշելով, որ ԿՀ Նախագահ Նգեսսոն այդ ժամանակ գտնվում էր Նյու-Յորքում և մասնակցում ՄԱԿ-ի Գլխավոր ասամբլեայի 78-րդ նստաշրջանի աշխատանքներին»<sup>25</sup>:

Ծածանվել էր, արդյոք, նաև Ադրբեջանի դրոշմը 2024 թ. մայիսի 19-ին Կինշասայում, հայտնի չէ: Սակայն մեզ հայտնի է, որ ռազմական գործողությունների ու

---

<sup>20</sup> <https://azertag.az/ru/xeber/prezident-ilham-aliev-sredi-napraavlennii-nashei-vneshnei-politiki-borba-sneokolo-nializmom-imeet-osoboe-znachenie-2962465> (բեռնման օրը՝ 04.06.2024) Այն հանգամանքը, որ Կոնգոյի (Բրազավիլ) նախագահ Ս. Նգեսսոյի որդին պետական նավթային ընկերության ղեկավարն է, անշուշտ, առանձնակի ջերմություն էին հաղորդել այս հանդիպմանը:

<sup>21</sup> Նախկին ֆրանսիական գաղութ, մինչ 1997 թ.՝ Զաիր:

<sup>22</sup> <https://www.reuters.com/world/africa/democratic-republic-congo-army-says-it-stopped-attempted-coup-2024-05-19/> (բեռնման օրը՝ 01.07.2024):

<sup>23</sup> ԿՀ և ԿԴՀ մայրաքաղաքներ՝ Բրազավիլը և Կինշասան գտնվում են Կոնգո գետի հանդիպակաց ափերին:

<sup>24</sup> <https://www.interfax.ru/world/961251> (բեռնման օրը՝ 12.06.2024)

<sup>25</sup> <https://www.africanews.com/2023/09/18/congo-denies-claims-of-coup-attempt/> (բեռնման օրը՝ 12.06.2024): Կոնգոյի վերաբերող այս իրադարձությունները մեզանում կարծես թե մնացին աննկատ: Մամուլում և լրահոսում դրանք ստվերվեցին Նախիջևանի սահմանի մոտ ուղղաթիռի առեղծվածային վթարի հետևանքով Իրանի նախագահ Է. Ռահիսիի, արտգործնախարար Հ. Աբդոլլահիանի և այլ պաշտոնյաների ողբերգական մահվան մասին լուրով: Նրանք վերադառնում էին նախագահ Ի. Ալիևի հետ հանդիպումից հետո՝ գետի վրա Խուդաֆերինի հիդրոէլեկտրակայանի և Գիզ-Կալասի հիդրոէլեկտրակայանի գործարկման պաշտոնական արարողությանը:

արկածախնդրությունների նախօրեին, ներգրավված երկրների նախագահների՝ Նյու Յորքում գտնվելը, ՄԱԿ-ի որևէ միջոցառմանը մասնակցելու նպատակով, ոչ միայն արգելք չէ, այլև կարելի ասել՝ նորմ դրանց իրականացման համար: Վկան՝ 2016 և 2020 թթ. պատերազմները մեզ մոտ, և բազում այլ դրվագներ՝ ողջ աշխարհում:

## 5. Սահելից՝ Խաղաղ Օվկիանոս, Կորսիկա և Կարիբյան Ծով

Հաշվի առնելով վերը շարադրվածը՝ կարծում ենք առկա են հիմքերը ենթադրելու, որ 2024 թ. մայիսին, արդեն Խաղաղ Օվկիանոսում գտնվող Նոր Կալեդոնիայում տեղի ունեցած անկարգությունները անհրաժեշտը է դիտարկել որպես Աֆրիկյան Սահելում, իրենց բնույթով՝ հակա-ֆրանսիական հեղաշրջումների շղթայի ընդլայնում դեպի Խաղաղ օվկիանոս: Ադրբեջանի արտաքին քաղաքականության այս հատկանշական ընդլայնման մասին արդեն խոսեցինք վերը: Բայց, որպեսզի տպավորություն չստեղծվի, որ խոսքը միայն Նոր Կալեդոնիայի մասին է, բերենք «Ադրբեջան-ՉԵՇ-գլոբալ Հարավ» համագործակցությանը առնչվող վերջերս արձանագրված ևս երեք ուշագրավ դրվագ:

Առաջինը վերաբերում է Միջերկրական ծովին և Կորսիկա կղզուն<sup>26</sup>: 2023 թ. հոկտեմբերի 24-ին Ադրբեջանի Միլի Մեջլիսում ստեղծվել էր 4 պատգամավորներից<sup>27</sup> բաղկացած պառլամենտական հատուկ խումբ՝ ի պաշտպանություն «Կորսիկայի ժողովրդի՝ ազգային ինքնության վերականգնման, հիմնարար իրավունքների ու ազատությունների ապահովման պայքարին»: Ըստ Միլի Մեջլիսի մամուլի ծառայության. «Այս խմբի նպատակն է աջակցել համաշխարհային հանրության ուշադրությանը Կորսիկայի ժողովրդի արդարացի պահանջներին և համախմբել միջազգային ջանքերը՝ ֆրանսիական գաղութային համակարգի կործանարար հետևանքների դեմ պայքարելու համար»<sup>28</sup>:

Նկատենք, որ սա տեղի է ունեցել Ֆրանսիայի Սենատի թիվ 50 հայտնի բանաձևի ընդունումից մոտ 100 օր առաջ: Հիշեցնենք, որ 2024 թ. հունվարի 17-ին Ֆրանսիայի խորհրդարանի վերին պալատը՝ Սենատը, Հայաստանի տարածքային ամբողջականությանն աջակցելու վերաբերյալ բանաձև<sup>29</sup> էր ընդունել, ինչպես նաև կոչ արել պատժամիջոցներ սահմանել Ադրբեջանի դեմ՝ Արցախում նախորդ տարվա սեպտեմբերին Բաքվի սանձարձակ հարձակման համար<sup>30</sup>: Հաջորդ օրը, 2024 թ. հունվարի 18-ին, Ադրբեջանի Միլի Մեջլիսի

<sup>26</sup> Կորսիկան, Նապոլեոնի հայրենիքը, հանդիսանում է Ֆրանսիայի 18 տարածաշրջաններից (Régions) մեկը, այն 5 տարածաշրջանների շարքում, որոնք գտնվում են Ֆրանսիայի մայրցամաքային տարածքից դուրս (Մարտինիկա, Գվադելուպա՝ Կարիբյան ավազանում, Ֆրանսիական Գվիանա՝ Լատինական Ամերիկայում, Կորսիկա՝ Միջերկրականում, Մայոտ և Ռեյունիոն՝ Հնդկական օվկիանոսում): Չխառնել Ֆրանսիայի անդրծովյան տարածքների (collectivité d'outre-mer) հետ:

<sup>27</sup> Турал Гянджалиев, Джаваншир Фейзиев, Шахин Исмайлов, Азер Керимли.

<sup>28</sup> <https://interfax.az/view/90224> (բեռնման օրը՝ 06.06.2024)

<sup>29</sup> <https://www.senat.fr/leg/tas23-050.pdf> (բեռնման օրը՝ 24.06.2024):

<sup>30</sup> Բանաձևը չունի իրավական պարտավորեցնող ուժ: Սա առաջին բանաձևը չէ, որը կոչ է անում Արցախյան հակամարտության ֆոնին պատժամիջոցներ կիրառել Ադրբեջանի դեմ: Վերջին նման բանաձևը ընդունվել էր 2022 թ.

միջազգային հարաբերությունների և միջխորհրդարանական հարաբերությունների հանձնաժողովը կոչ արեց կառավարությանը պատժամիջոցներ սահմանել Փարիզի դեմ՝ ի պատասխան Ֆրանսիայի Սենատի հիշյալ որոշման:

Առաջարկվել էր նաև դադարեցնել բոլոր տնտեսական հարաբերությունները Ֆրանսիայի հետ և ճանաչել «Կանակայի» (Նոր Կալեդոնիա), «Մաոհի-Նուիի» (Ֆրանսիական Պոլինեզիա) և Կորսիկայի անկախությունը: Կոմիտեն կոչ է արել սառեցնել ֆրանսիացի պաշտոնյաների բոլոր ակտիվները, երկրից վտարել ֆրանսիական բոլոր ընկերությունները, ներառյալ՝ նավթագազային *Total Energies* ընկերությունը, արգելել ֆրանսիական ընկերություններին մասնակցել պետական նախագծերին<sup>31</sup>:

Հաջորդը վերաբերում է Կարիբյան ավազանին: Ըստ թուրքական և ադրբեջանական 2024 թ. հունիսի 20-ի մի շարք հրապարակումների, Գվադելուպայի<sup>32</sup> Ազգային Միության միջազգային համագործակցության գծով հատուկ ներկայացուցիչ Պ. Տասիտը հայտարարել էր. «Ֆրանսիան իր ներկայիս հզորությանը հասել է մեր հողերի շնորհիվ: Եթե մի կողմ դնենք անդրծովյան տարածքները, ինքը՝ Ֆրանսիան, փոքր երկիր է: Իսկ մենք հարուստ ռեսուրսներ ունենք, և այդ պատճառով Ֆրանսիան չի ցանկանում մեզ ազատ թողնել: Մենք խնդրում ենք Ադրբեջանին օգնել մեզ: Ողջ աշխարհն է ճանաչում Ադրբեջանը և մենք ցանկանում ենք, որ ամբողջ աշխարհը ձեր միջոցով իմանա մեր մասին»<sup>33</sup>:

Ուշագրավ է, որ ըստ Ադրբեջանի կաթոլիկ եկեղեցու կայքի, 2022 թ. դեկտեմբերի 10-ին Բաքվի Սուրբ Մարիամ Աստվածածնի Անարատ Հղության եկեղեցում<sup>34</sup> մատուցվեց Սուրբ պատարագ՝ նվիրված Գվադալուպեի Տիրամոր<sup>35</sup> տոնակատարությանը: Պատարագին մասնակցել էին Լատինական Ամերիկայի և Կարիբյան ավազանի երկրների դեսպանությունների ղեկավարներն ու Լատինական Ամերիկայի երկրների ադրբեջանաբնակ կաթոլիկները<sup>36</sup>: Հիշեցնենք, որ Գվադելուպայի ներկայացուցիչները սկսած 2023-ից մասնակցում են վերը հիշատակված ԵՄԴ կողմից կազմակերպված միջոցառումներին, մասնավորապես՝ 2023 թ. հոկտեմբերի 20-ին Բաքվում կայացած «Նեոգաղութատիրություն. Մարդու իրավունքների խախտում և անարդարություն» կոնֆերանսին (տես վերը):

---

նյութերին: Մինչ օրս, ո՛չ Փարիզը ո՛չ էլ այլ մայրաքաղաք, Բաքվի նկատմամբ պատժամիջոցներ չի սահմանել:

<sup>31</sup> <https://www.kommersant.ru/doc/6455633> (բեռնման օրը՝ 24.06.2024):

<sup>32</sup> 1628 քառ. կմ մակերեսով կղզի-պետություն Կարիբյան ծովի արևելյան հատվածում: 1946-ից հանդիսանում է Ֆրանսիայի անդրծովյան դեպարտամենտ (département d'outre-mer): Բնակչությունը մոտ 400 հազ մարդ, որի 95%-ը՝ կաթոլիկ:

<sup>33</sup> <https://report.az/ru/vneshnyaya-politika/predstavitel-gvadelupy-franciya-pytaetsya-izolirovat-nas-my-prosim-pomoshhi-u-azerbajdzhana/> (բեռնման օրը՝ 24.06.2024):

<sup>34</sup> Կառուցումն ավարտվել է 2006-ին: Օծվել է 2012-ին՝ ի պատիվ Հովհաննես Պողոս II պապի Ադրբեջան կատարած այցի հոբելյանի (150 կաթոլիկներ ունեցող Ադրբեջան, Հռոմի պապը այցելել էր 2002-ին, նախագահ Հ. Ալիևի հրավերով), <https://www.svoboda.org/a/24223339.html> (բեռնման օրը՝ 01.07.2024):

<sup>35</sup> Our Lady of Guadalupe. Մեքսիկայի, Կենտրոնական Ամերիկայի և Կարիբյան ավազանի կաթոլիկների ամենահարգի կերպարը:

<sup>36</sup> <https://www.catholic.az/en/archives/2507> (բեռնման օրը՝ 01.07.2024):

Անցնենք այս կոնֆերանսի ևս մի մասնակցին՝ Ֆրանսիական Պոլիտեզիային: 2024 թ. հունիսի 28-ին հայտնի դարձավ<sup>37</sup>, որ Ադրբեջան է ժամանել Ֆրանսիական Պոլիտեզիայի «Tavini Huiraatira»<sup>38</sup> կուսակցության պատվիրակությունը, «Ֆրանսիական Պոլիտեզիայի ապագաղութացման իրավունք. Մարտահրավերները և Հեռանկարները» խորագրով կոնֆերանսին մասնակցելու նպատակով: «Москва-Баку» ամսագրի տվյալներով, այս կոնֆերանսի անցկացման մասին պայմանավորվածությունը ձեռք էր բերվել 2024 թ. ապրիլի 30-ին՝ БИГ կողմից Վիեննայում գտնվող ՄԱԿ-ի գրասենյակում կազմակերպված «Ազատում գաղութատիրությունից. Ուժացման հետևանքները և ազդեցությունը մարդու իրավունքների իրացման վրա» խորագրով մեկ այլ կոնֆերանսի աշխատանքների ընթացքում<sup>39</sup>:

Գտնվելով Բաքվում, «Tavini Huiraatira» կուսակցության գլխավոր քարտուղար՝ Վ. Մամաատուաիխուտապուն հայտարարել էր, որ «Ֆրանսիական Պոլիտեզիան ունի Ադրբեջանի օժանդակության կարիքը: Քաղաքականապես մենք երիտասարդ ժողովուրդ ենք, ու Ադրբեջանի օգնության կարիքն ունենք: Մենք հավաքում ենք, որ դուք կօգնեք մեզ, և որ արդարությունն, ի վերջո, կհաղթի»<sup>40</sup>:

Թե հատկապես ի՞նչ օգնություն էր ակնկալում Ադրբեջանից այս գլխավոր քարտուղարը, այն երկրից, որն ավելի քան մեկ դար զբաղված է հայերի, թաթերի, լեզգիների, խինալուղների, հրեաների և ավարների ուժացմամբ, դժվար է պատկերացնել: Մի բան, սակայն, պարզ է, հավանաբար, շուտով մենք կլսենք նաև Ֆրանսիական Պոլիտեզիայում խժժությունների մեկնարկի մասին:

Ինչ վերաբերում է Բաքվի 2023 թ. հոկտեմբերի 20-ի կոնֆերանսի մեկ այլ մասնակցին՝ Ֆրանսիական Գվիանային, ապա հաշվի առնելով այն հանգամանքը, որ այստեղ է գտնվում Ֆրանսիայի «Կուռու» տիեզերարձակ կայանը, նկատի ունենալով դրա կարևորությունը ֆրանսիական բարձր տեխնոլոգիական ու ռազմավարական նշանակության ծրագրերի իրագործման համար, հիշելով Ադրբեջան-Սուրիանամ ուշագրավ համագործակցությունը, Բոլիվիայում և Վենեսուելայում ՌԴ էական ներկայությունը, կարելի է ենթադրել, որ մենք դեռ կհանդիպենք այս երկրների անունները օրվա «Breaking news» քաղաքական լրահոսում:

Ի մի բերենք մինչ այժմ ասվածը:

1. Սահելի գոտում ու այլ երկրներում հեղաշրջումների դինամիկան ու դրանց մանրամասները հստակ վկայում են ԱՄՆ-ի (և «անգլոսֆերայի») և Ֆրանսիայի (ու

<sup>37</sup> <https://oxu.az/ru/politika/polinezijjskaya-partiya-vyrazila-blagodarnost-azerbajdzhanu-za-podderzhku> (բեռնման օրը՝ 01.07.2024)

<sup>38</sup> Թարգմանաբար այն նշանակում է «Ժողովրդի Ծառ», ինչն ակամայից հիշեցնում է ուկրաինական հայտնի երգիծական «Слуга народа» սերիալը:

<sup>39</sup> [https://moscow-baku.ru/news/politics/v\\_azerbaydzhan\\_pribyla\\_delegatsiya\\_frantsuzskoy\\_polinezii\\_dlya\\_ustanovleniya\\_sotrudnichestva/](https://moscow-baku.ru/news/politics/v_azerbaydzhan_pribyla_delegatsiya_frantsuzskoy_polinezii_dlya_ustanovleniya_sotrudnichestva/) (բեռնման օրը՝ 01.07.2024):

<sup>40</sup> <https://report.az/ru/vneshnyaya-politika/gensek-partii-tavini-huiraatira-francuzskaya-polineziya-nuzhdaetsya-v-podderzhke-azerbajdzhana/> (բեռնման օրը՝ 01.07.2024):

«Ֆրանկոսֆերայի») միջև գլոբալ բախման մասին: Հիշենք միայն AUKUS դաշինքի հետագա ամրապնդման, Ավստրալիային գրոհային միջուկային սուզանավերի տրամադրման ու այս գործարքից Ֆրանսիայի արտաքսման արտառոց, գլոբալ նշանակության դրվագը:

2. Որքան էլ դա տարօրինակ թվա, ստիպված ենք ենթադրել, որ Աֆրիկյան հեղաշրջումների այս շղթայում ՌԴ-ն, մասնակի՝ նաև Չինաստանը, «խաղում են» ԱՄՆ-ի և «անգլոսֆերայի» օգտին՝ ընդդեմ Ֆրանսիայի ու «Ֆրանկոսֆերայի»: Գիտակցված, թե՛ իրավիճակային հաշվարկներից դրդված՝ դա առանձին, ծավալուն և նուրբ հարց է:

3. Ելնելով նրանից, որ ԿՀ-ն ու ԿԴՀ-ն դուրս են գտնվում Սահելի գոտուց, ինչպես և Գաբոնը (տես վերը), կարելի է ենթադրել որ ՌԴ ու Ադրբեջանի միջև առկա է որոշակի «դերաբաժանում»։ բուն Սահելի գոտին, ինչպես նաև Կորեական թերակղզին ու Հարավարևելյան Ասիան, հավանաբար, հանդիսանում են ՌԴ ազդեցության տիրույթ, իսկ Ադրբեջանը կենտրոնանում է աֆրիկյան անդր-Սահելյան երկրների և մոլորակի այլ հատվածներում գտնվող «Ֆրանկոսֆերայի» երկրների վրա:

4. Անթույլատրելի պարզեցում կլինի պայմանավորել այս հեղաշրջումներին ՌԴ ներգրավվածությունը, ոմանցում՝ Ադրբեջանի առկայությունը, բացառապես Ուկրաինայում ՌԴ կողմից վարվող ՀՌԳ-ով ու դրա հանդեպ Ֆրանսիայի դիրքորոշումով, կամ Հայաստան-Ֆրանսիա համագործակցության դինամիկայով: Ավելի համարժեք է դիտարկել դա գլոբալ «Հարավ» և «Հյուսիս» դիմակայության համարեքստում [1], սեփական ազդեցության մակրո-ռեգիոնների ստեղծման ուղղությամբ ՌԴ և Չինաստանի ջանքերի հետ, որոնց տրամաբանության մեջ Ադրբեջանը փորձում է տեղավորել սեփական աշխարհաքաղաքականությունը:

Բոլոր դեպքերում օգտակար է հիշել, որ Սահելի գոտում ու աֆրիկյան մի շարք այլ երկրներում հեղաշրջումները սկսվեցին շատ ավելի վաղ, քան Ուկրաինայում սկսվեց ՀՌԳ-ն: Իսկ ադրբեջանական Միլի Մեջլիսում Կորսիկային նվիրված պառլամենտական խումբը ստեղծվեց Ֆրանսիական Սենատում թիվ 50 բանաձևի ընդունումից 100 օր առաջ:

## **6. «Էջ նստելը մի աիբ է, իջնելը՝ երկու»**

Եզրափակենք հոդվածը դիտարկումներով, որոնք առնչվում են «Հյուսիս» և «Հարավ» դիմակայության գաղափարախոսական հենքին՝ նեոգաղութատիրության դեմ պայքարում «ծախական» քաղաքական խոսույթին, ինչպես նաև «հայրեր և որդիներ» դասական կոնֆլիկտին, սերնդային ալիքների դինամիկային ու պատմական քաղաքականությանը [6]:

Հասկանալի է, որ Ադրբեջանի մուտքը գլոբալ «Հյուսիսի» և «Հարավի» դիմակայություն, ինչպես նաև վերջին տարիներին լայնածավալ օրակարգով արտաքին քաղաքականության վարումը, էական մարտահրավերներ են՝ Հայաստանի ու դրա արտաքին քաղաքականության համար: Հասկանալի է նաև, որ այստեղ ծագող խնդիրների պարզ ձևակերպումն անգամ առանձնակի ջանք է պահանջում, սթափ և համակողմանի վերլուծություն: Կարծում ենք, որ այս



ամենը դեռ առջևում է, և պետք է դառնա հայկական վերլուծական հանրության կարևոր խնդիր: Սակայն արդեն այստեղ անհրաժեշտ է նշել հարցի մի քանի, ոչ այնքան ակնհայտ, կողմեր:

Բանն այն է, որ նեոգաղութատիրության դեմ պայքարում «Հյուսիս» և «Հարավ» գլոբալ դիմակայությունը գլխավորելու ՌԴ և Ադրբեջանի գործողությունների համաժամանակեցումը, ինչ խոսք, ունի կիրառական նպատակ. առաջ մղել սեփական աշխարհաքաղաքական օրակարգը: Ընդ որում, ունենալով որոշակի նմանություն, ՌԴ և Ադրբեջանի համար դրանք էականորեն տարբերվում են միմյանցից:

Բայց, նման համաժամանակեցումը պարտավորեցնող է այն առումով, որ ենթադրում է նաև գաղափարախոսական համաժամանակեցում, այսինքն՝ «ծախական» ուժերի, նեոմարքսիստական, նեոտրոցկիստական և մաոիստական խմբավորումների հետ համագործակցություն: Ու եթե ԽՍՀՄ ժառանգորդ՝ ՌԴ-ն դրա հարուստ փորձն ունի՝ «Կոմինտերնից» մինչև ԽՄԿԿ Քաղբյուրոյի արտասահմանյան բաժին, ու ՊԱԿ-ի (ԿԴԵ) և ՀԳՎ (ԲԿԿ) համապատասխան ստորաբաժանումներ, ապա Ադրբեջանն այս փորձը կուտակում է այսօր՝ նախագահական ապարատում<sup>41</sup> և ԲԻԳ նախաձեռնության շրջանակներում:

Ընդհանրապես, նեոգաղութատիրության դեմ պայքարն ու «ծախական» խոսույթն իրենց բնույթով երկսայր սուր են: Դրանք հաջողությամբ օգտագործվում են հակադիր աշխարհաքաղաքական բևեռների կողմից: Վերջին օրինակները կարել է գտնել, մի կողմից՝ Եվրախորհուրդի պառլամենտական ասամբլեայի 2024 թ. ապրիլի 17-ին ընդունված բանաձևում, որն Նավալնու մահվան կապակցությամբ կոչ է անում «ապագաղութացնել ՌԴ փոքր ազգությունները»<sup>42</sup>: Մյուս կողմից, այն հստակորեն ընդգծված է 2023 թ. հուլիսյան «ՌԴ–Աֆրիկա» գագաթնաժողովի, և ադրբեջանական ԲԻԳ նախաձեռնության հիմնարար փաստաթղթերում (տես վերը):

ՌԴ ու Ադրբեջանի կողմից ապագաղութացման խոսույթի նման համաժամանակեցված օգտագործումը, կճոճի ադրբեջանական հասարակությանը դեպի «ծախական» դաշտ: Առավել ևս 2023-ից հետո, երբ կարծես թե լուծվել է «Ալիևների կլան – ադրբեջանական ժողովուրդ» հասարակական դաշինքի հիմնական խնդիրը՝ Ղարաբաղը հայաթափված է ու գտնվում է Ադրբեջանի կազմում:

Իսկ սա նշանակում է, որ ադրբեջանական հասարակությունում կակտիվանա «ծախական» խոսույթը՝ արդար ու հավասար պայմաններ բոլորի համար, կոռուպցիայի բացառում, մարդու իրավունքների պահպանում և այլն: Ինչը, կամա թե ակամա, կմերձեցնի Ադրբեջանը ռուսաստանյան «ծախական» շրջանակներին ու «ԽՍՀՄ 2.0» ծրագրի ջատագովներին: Այս առումով բնութագրական է երկու կարևոր գաղափարախոսական (և, հասկանալի է՝

<sup>41</sup> Այստեղ անշուշտ կարևոր է Ալիև-ավագի հարուստ ժառանգությունը ԽՍՀՄ ՊԱԿ և մոլորակի «ծախական», հեղափոխական ուժերի հետ համագործակցության առումով:

<sup>42</sup> [Парламентская ассамблея СЕ приняла резолюцию, признающую Россию де-факто диктатурой и призывающую к деколонизации малых наций РФ.](#) (բեռնման օրը՝ 01.07.2024):

քարոզչական) հոդվածների գրեթե միաժամանակյա հրապարակումը. նկատի ունենք ՌԴ նախկին նախագահ Դ. Մեդվեդևի «Время метрополий истекло» հոդվածը [7], և haqqin.az կայքի «Алиев и трансформация» խմբագրականը [8]:

Իրականում իրադրությունն այստեղ ավելի բարդ է, պայմանավորված նրանով, որ «ԽՍՀՄ 2.0» ծրագիրը, կամ «ռուսական նոր կայսերականությունը», առավել ևս՝ «Սլավոնական սուրբ դաշինքը», որոշակի հակասության մեջ են գտնվում բուն ռուսական «եվրասիականության»<sup>43</sup> հետ, և սուր հակասության՝ «Թյուրքական աշխարհ» ծրագրի հետ: Այս առումով ադրբեջանական «ձախական» ուժերը (հանգուցյալ Ջամալներից մինչև կենդանի Մ. Շևչենկո, Ա. Յունուս և այլն) դեռ պետք է կողմնորոշվեն: Ակամայից կողմնորոշելով նաև մեր քաղաքական ու աշխարհաքաղաքական խոսույթը:

Վերջապես, նեոգաղութատիրության դեմ պայքարը ուրույն կերպով կապված է հակակոռուպցիոն պայքարին, դրա գաղափարախոսական ու ժողովրդագրական ասպեկտներին, մասնավորապես՝ «հայրեր և որդիներ» սերնդային կոնֆլիկտին [6]: Նկատի ունենք այն, որ նեոգաղութատիրության դեմ պայքարը, լինելով ընդհանուր առմամբ «ձախական», հիմնվում է սոցիալական արդարության ապահովման գերակայության վրա: Բայց նույն հիմքի վրա է նաև կանգնած կոռուպցիայի դեմ պայքարը՝ միևնույն ժամանակ լինելով նաև ներքին քաղաքականության վերին աստիճան արդյունավետ գործիք:

Ի վերջո, անցած տասնամյակում Ա. Նավալնու ՓԵԿ-ն<sup>44</sup> Ռուսաստանի միակ կազմակերպված ընդդիմադիր ուժն էր և այն մնում է այդպիսին անգամ այսօր, Ա. Նավալնու մահից հետո: Դրա վկայությունը թերևս կարելի է տեսնել այն մեծ հասարակական և քաղաքական արձագանքում, որին արժանացավ Մ. Պևչիսի<sup>45</sup> «Դավաճանների ժամանակը» փաստագրական սերիալը: Այդ սերիալի գաղափարախոսական և քարոզչական էությունը սերնդային կոնֆլիկտի տեսանկյունից լավագույնս ձևակերպեց Ս. Բելկովսկին<sup>46</sup>: Նա ներմուծեց «ԵՄՊ սերունդ» հասկացությունը<sup>47</sup>, որին և ուղղված էր հիշյալ սերիալի հիմնական քաղաքական ու քարոզչական պատգամը: Այստեղ ԵՄՊ հասկանումը<sup>48</sup> նշանակում է «без меня поделили», այսինքն՝ «առանձ ինձ բաժանեցին» (ԱԻԲ), ինչը և խորհրդանշում է այսօրվա ռուսաստանյան «որդիների» սերնդի ընդվզումը՝ «հայրերի» սերնդի հանդեպ, որոնք թաղվելով համատարած կոռուպցիայի մեջ, «դավաճանեցին Հայրենիքին և բերեցին այն կործանման եզրին»:

<sup>43</sup> Սիմավորյան Ա. Ս., «Թյուրքական եվրասիականության» և «ռուսական եվրասիականության» գաղափարախոսությունների համեմատական վերլուծությունը, ԱՌՎԱԿ, (10.07.2023), <https://shorturl.at/E7dFD> (բեռնման օրը՝ 01.07.2024):

<sup>44</sup> 2021 թ. հունիսից ՌԴ իշխանությունների կողմից ճանաչվել է՝ որպես ահաբեկչական կազմակերպություն:

<sup>45</sup> 2023 թ. մայիսից ՌԴ իշխանությունների կողմից ճանաչվել է՝ որպես օտարերկրյա գործակալ:

<sup>46</sup> 2023 թ. սեպտեմբերից ՌԴ իշխանությունների կողմից ճանաչվել է՝ որպես օտարերկրյա գործակալ:

<sup>47</sup> <https://youtube.com/watch?v=Ns3soBqrcl4&si=pXUBGZcKnCvMQxUn> (բեռնման օրը՝ 04.07.2024):

<sup>48</sup> Այս հասկանումը նշանակում է նաև «боевая машина пехоты» (հետևակի մարտական մեքենա), այս սահմանմանը հաղորդելով լրացուցիչ խորություն, ու դարձնելով այն իրապես սրամիտ:

Որդեգրելով նեոգաղութատիրության դեմ պայքարի խոսույթը և «ձախական» կարգախոսներով մտնելով «Հարավ» և «Հյուսիս» դիմակայության դաշտ, Ադրբեջանի ներքաղաքական կյանքը անխուսափելիորեն կճոճվի դեպի «ձախ»: Եվ աստեղ առաջին պլան կգան սոցիալական արդարության պահանջը, և պայքարը կոռուպցիայի դեմ:

«Խաղեր տալ» հասարակական այս զգացմունքների հետ՝ պարտավորեցնող ձեռնարկում է, անգամ այն պարագայում, երբ Ադրբեջանի հիմնական խնդիրը «լուծվել է» առանց երկիրը կործանման եզրին հասցնելուն: Չե որ ժամանակը կանգ չի առնում: Ադրբեջանում գալիք սերնդին պետք է ինչ-որ բան առաջարկել, ավելին՝ քան արդեն իսկ արձանագրված «հաղթանակը»: Դե իսկ Հայաստանը արդեն վերապրել է «որդիների սերնդի» իր հակակոռուպցիոն «հեղափոխությունը»:

Ինչպես ասում են՝ «էշ նստելը մի ԱԻԲ է, իջնելը՝ երկու»:

## ԱՂԲՅՈՒՐՆԵՐ ԵՎ ԳՐԱԿԱՆՈՒԹՅՈՒՆ

1. Марджанян А. А., Армения на карте «Войны и Мира»: «ԱՌՎԱԿ» վերլուծական կենտրոն, (27.05.2024), <https://arvak.am/ru/армения-на-карте-войны-и-мира/>
2. Марджанян А. А. ОДКБ - современные вызовы. Взгляд из Армении. ЕВРАЗИЙСКАЯ ИНТЕГРАЦИЯ: экономика, право, политика. 2019, (1): 61-66. <https://www.eijournal.ru/jour/article/view/210>  
Տես նաև Марджанян А. А. Для ОДКБ наступил момент истины. «Голос Армении», 16 ноября 2018. <https://www.golosarmenii.am/article/73216/dlya-odkb-nastupil-moment-istiny->
3. Սևծովյան Տնտեսական Համագործակցության Կազմակերպություն. Տեղեկանք: «ՕՐԲԵԼԻ» կենտրոն: 2019 թ., փետրվար:
4. Бакинская инициативная группа против последней неокOLONIALной империи. (21.10.2023), <https://kavkazplus.com/news.php?id=41509>.
5. В Милли Меджлисе состоялась научная конференция на тему «Новая Каледония: история, современные вызовы и ожидаемое будущее», (18.04.2024), [https://azertag.az/ru/xeber/v\\_milli\\_medzhlise\\_sostoyalas\\_nauchnaya\\_konferenciya\\_na\\_temu\\_novaya\\_kaledoniya\\_istoriya\\_sovremennye\\_vyzovy\\_i\\_ozhidaemoe\\_budushchee\\_obnovleno-2971991](https://azertag.az/ru/xeber/v_milli_medzhlise_sostoyalas_nauchnaya_konferenciya_na_temu_novaya_kaledoniya_istoriya_sovremennye_vyzovy_i_ozhidaemoe_budushchee_obnovleno-2971991)
6. Մարջանյան Ա. Հ., Գլոբալ տարածաշրջաններ, սերնդային ալիքներ եվ պատմական քաղաքականություն: «21-րդ ԴԱՐ», թիվ 3 (79), 2018 թ., <https://artsakhib.am/wp-content/uploads/2019/06/Արա-Մարջանյան-Գլոբալ-տարածաշրջաններ-սերնդային-ալիքներ-և-պատմական-քաղաքականություն.pdf>
7. Медведев, Д. А., Время метрополий истекло. (14.06.2024). <https://rg.ru/2024/06/14/vremia-metropolij-isteklo.html>
8. Алиев и трансформация. (27.06.2024), <https://haqqin.az/news/320470>